

**166,363 terima suntikan vaksin, Sarawak rekod jumlah paling tinggi - Dr Noor Hisham
Astro Awani
09 Mac 2021
Fauzi Suhaimi**

KUALA LUMPUR: Seramai 166,363 individu dalam kumpulan fasa pertama menerima dos pertama vaksin COVID-19 menerusi Program Imunisasi COVID-19 Kebangsaan (PICK) setakat 8 Mac 2021.

Ketua Pengarah Kesihatan, Tan Sri Dr Noor Hisham Abdullah berkata, daripada jumlah itu, Sarawak kekal merekodkan jumlah paling tinggi iaitu seramai 25,271 individu.

Katanya, Pahang mencatatkan jumlah kedua tertinggi iaitu sebanyak 15,521 individu divaksin, diikuti Selangor (15,357); Johor (13,746); Wilayah Persekutuan Kuala Lumpur (13,681); Sabah (13,474); Kelantan (13,149); dan Perak 12,952 individu.

“Negeri yang mencatatkan jumlah bawah 10,000 pula termasuk Kedah iaitu 9,358 individu, diikuti Terengganu (9,081); Pulau Pinang (6,487) dan Negeri Sembilan 5,981 individu.

“Lain-lain negeri masih mencatatkan jumlah di bawah 5,000 orang iaitu Melaka sebanyak 4,411; Perlis (3,062); Wilayah Persekutuan Putrajaya (92,573); dan Wilayah Persekutuan Labuan 2,259 individu,” katanya dalam ciapan di akaun Twitternya di sini, pada Selasa.

Sementara itu, Jawatankuasa Khas Jaminan Akses Bekalan Vaksin COVID-19 (JKJAV) memaklumkan, setakat jam 8 pagi pada Selasa, seramai 4.2 juta rakyat telah berdaftar sebagai penerima vaksin berbanding 3.8 juta orang, semalam.

PICK 2021 mula dilancarkan pada 24 Februari lalu dan Perdana Menteri, Tan Sri Muhyiddin Yassin bersama Dr Noor Hisham menjadi individu pertama menerima suntikan dos pertama vaksin COVID-19.

© 2021 Astro AWANI Network Sdn. Bhd. (535275-D) All Rights Reserved.
Source: <https://www.astroawani.com/berita-malaysia/166363-terima-suntikan-vaksin-sarawak-rekod-jumlah-paling-tinggi-dr-noor-hisham-286923>